

Siunnersuut: Annertuumik innarluutillit ikiorserneqartarnerat pillugu inatsisartut peqqussutaata allanngortinneqarnissaa pillugu Inatsisartut peqqussutaat
(Isumaginninnermut Naalakkersuisoq)

Saqqummiussissut

(Isumaginninnermut Naalakkersuisoq)

Siullermeerneqarnera

Naalakkersuisut matumuuna annertuumik innarluutillit pillugit inatsisartut peqqussutaata allanngortinneqarnissaanut siunnersuummik saqqummiussaqrput. Allannguutissatut siunnersuummut tunuliaqutaavoq innarluutilinnut suliassaqrfiup kommuninut nuunneqarnissaa pillugu kommunini aqqissuussaannermut iluarsartuusseqinnermi innersuussutigineqarsimanera. Tassani aallaaviuvoq pisortat ingerlatsinnermut suliassat kommuninit aqqiivigineqartassammata, namminersorlutillu oqartussat suliassarissallugu inatsisiliorneq, kommunillu ingerlatsinerisa nakkutigineqarnerat.

Siunnersuutip kingunerissavaa aningaasaliinissamut piginnaatitaaffik aningaasaqarnikkullu akisussaaneq tamakkerlugit nuunneqassammata, Naalakkersuisullu annertuumik innarluutilinnut ulloq unnuarlu paaqqinnittarfiit pillugit ingerlatsinnermut suliassat ingerlatiinnassallugit.

Kommunit massakut isumaginninnikkut suliassat tamakkingajallugit sularisarpaat, massakkullu piffissanngorpoq innarluutilinnut suliassat kommuninit tiguneqarnissaat.

Ullumikkut innarluutilinnut tunngassuteqartunut suliat “marloriaammik” sularineqartarput, tassami sulianik ingerlatsineq siullermik kommunini sularineqartarmat kingornatigullu Naalakkersuisunut inassutigalugit nassiunneqartarlutik, Naalakkersuisuniillu akuerineqartarlutik. Siunnersuut aqutigalugu siunissami suliat sukkanerusumik sularineqartalernissaat periarfissaqarnerulissaaq, suliat sularineqarneri kommunini ingerlanneqalerpata. Taamaammat innuttaasumut iluaqutaassaaq qanimut aalajangiinerit pisarpata.

Kommunit ullumikkut nukinik atuisarput aningaasartuutaasimasut Nunatta Karsianit utertinniarnernani, taakkulu siunissami kommunit namminneq aningaasaqarnikkut killiliussaasa iluanni aqunneqarsinnaassapput. Taamaalilluni siunnersuutip aamma innarluutilinnut aningaasaqarnikkut aqutsinerit pisariinnerulersissavai.

Ataatsimut isigalugu pisortani suliffeqarfiit allaffissornikkut suliassarpassui malunnartumik annikinnerulernissaannik siunnersuut sunniuteqassaaq. Taamaaliornikkut innarluutilinnut suliassat Namminersorlutik Oqartussat aamma kommunit akornanni nuunneqarneranni qitiusumik tunngavigineqartussat anguneqassapput, ilaatigullu innuttaasunut pitsaanerusumik sunniuteqarnerusumillu sullissinerit anguneqassapput, kiisalu periarfissaqartutigut marloriaammik allaffissorneq atorneqarunnaarluni.

Siunnersuummi maleruagassanik aalajangersaasoqassaaq kommunit innarluutilinnut tunngasunik aqutsinnerminni malitassaannik. Taakku saniatigut Naalakkersuisut annertuumik innarluutillit ikiorserneqartarnerat pillugu nalunaarummut nutaamut siunnersuummik

suliaqassapput, kiisalu annertuumik innarluutillit ikiorserneqartarnerat pillugu ilitsersuutit iluarsartuutissallugit. Naalakkersuisut eqqummaariffisorujussuuvaat nalunaarutip nutaap ilitsersuutillu iluarsartuussat kommunini sulianik ingerlatsisunut iluaqutaasumik sakkunngornissaat. Aammattaaq Naalakkersuisut eqqumaffigaat kommunit ikaarsaariarnermi Isumaginninnermut Naalakkersuisoqarfimmit siunnersuineramik ilitsersuunneqarnissamillu pisariaqartitsinissaat.

Siunnersuutip kingunerissavaa ulloq unnuarlu paaqqinnittarfinnik ingerlatsineq Naalakkersuisut suli suliarissammasuk. Tamatumunnga pingaarnertut pissutaavoq annertuumik innarluutilinnut aammalu meeqqanut inuusuttunullu ulloq unnuarlu paaqqinnittarfinnut ingerlatsinermi suliassat kommunit ataatsimoorlutik qanoq isillutik tigusinissaannut suleriaasissamik suli suliaqartoqanngimmat.

Naalakkersuisut ulloq unnuarlu paaqqinnittarfiit pillugu KANUKOKA-mik oqaloqatiginnittarput, tassanilu pissutsit arlallit annerusumik erseqqissarneqarlutillu paasiniarneqassapput. Kommunit ataatsimoorlutik ulloq unnuarlu paaqqinnittarfinnik ingerlatsinissamik kissaateqarnerinut atatillugu, inatsisitigut pissutsit erseqqissarnissaasa saniatigut, paaqqinnittarfiit pineqartut kommuninut nuunneqannginneranni ajornartorsiutit Ulloq Unnuarlu Paaqqinnittarfiit 2008-mut Ukiumoortumik Nalunaarutaanni kingullermi eqqaaneqartut suliareqqaarnissaat Naalakkersuisut kissaatigaat. Ukiumoortumik nalunaarummi ilaatigut saqqummiunneqarpoq ataatsimut isigalugu sulisut ilinniarsimasut sulisussarsiarinissaat sulisoriinnarnissaallu assut ajornartorsiutaasoq.

Aningaasaqarnikkut piginnaatitsinerup tamakkiisumik kommuninit tiguneqarnissaanut atatillugu siunnersuutip matumani pineqartup aappassaaneernejarnissaanut allannguutissatut siunnersuuteqarnissamik Naalakkersuisut eqqarsaateqarput. Tamatumani pineqarpoq § 26, imm. 2, Naalakkersuisut annertuumik innarluutilinnut ulloq unnuarlu paaqqinnittarfinnut sanasoqarnissaanut ingerlatsinissamullu tamatuma kingorna tapiissuteqarsinnaalerlutik. Taassuma aalajangersakkap meeqqanut inuusuttunullu ikiorsiissutit pillugit inatsisartut peqqussutaanni § 37, imm. 3-p assigaa. Naalakkersuisut ingerlatsinermut tapiissutinut aalajangersagaq atorunnaarnissaa eqqarsaatigaat, tassami innarluutilinnut isumaginninnerup nuunneqarnerani pingaarnertut anguniagaammat ingerlatsinerup tamakkiisumik kommuninit tiguneqarnissaa.

Aammattaaq piffissaq iluatsillugu malugeqquara IPIS, Innarluutillit Pillugit Ilisimasaqarfik Siunnersuisarfiutigisoq 2009-mi pilersinneqarsimammat. IPIS innarluutilinnut pingaaruteqarluni nutaajullunilu sullissiviusoq innarluutilinnut, ilaqaatasunut, innarluutilinnik suliaqartunut paaqqinnittarfinnullu sammisoq, kisiannili innuttaasunit tamanit atorneqarsinnaasoq innarluutilinnik suliaqarnermut siunnersorneqarnissamik ilisimasaqarnerulernissamillu kissaateqartunut. IPIS Namminersorlutik Oqartussat iluanni atuukkallassaaq, tassami IPIS piffissap ingerlanerani sungiusaqqinnermut immikkoortortamik ikiuutinullu immikkoortortamik piorsarneqarumaarmat.

Naalakkersuisut siunnersuutaat taamatut oqaasertalerlugu Inatsisartunut akuersaartumik suliassanngortillugu inassutigaat.